

之流出處行藏本非凡解傳授年限聽可依前今日人師促齡難保預達經教芥子投鋒得在受書盲龜遇孔若約年限恐與願違但令行以慈仁心懷至道合前十願乃可授之登真隱訣云有至學之子唯當勤心幽靈啓請玄師才分苟合必將感悟得是乘真應付之限然後乃盟盟而修修而必終吾將分金與之爲友不如此者無煩強營徒守之滿笈適足累其七祖考河之石彌增其多耳古人謂之皮好吾今號爲耳學所以開道則騰行遁寂則俱亡也夫道必須授受乃得遵修者非爲徒然如世中禁術若非傳受則用之不行舉此一言足以深悟

玄都律曰道士女官身上佩吏兵不得滾傳授他人道法若有至心精勤之人聽可若授惡逆之人三世被考自然訣曰傳授先齋三月或十日三十日二十日竟師與弟子俱登山山峯壇石上傳經弟子受經之後若便有至人丹心好道者乃齋實信求受可授不須年限竟而無其人後聽并傳其法信爲一切

作福田不得師自私自用其罪深重

明真科曰浮好三寶執心不專輕忘經法穢慢靈文或傳授弟子不依科年或不關天地私傳無盟自作一法違負四盟或齋戒怠慢微忽上真其罪深重死被兇鉗循上劍樹八達交風吹樹低昂足落刀山往返無數手體爛傷痛不可忍毒不可任萬劫當得還生下愚之中或嬰六疾或盲不聽長與道隔未迷學門轉輪五苦沉淪罪因不得開度長植惡根非法傳經自招此考師實貴愛妙之道也

要修科儀戒律鈔卷之一

要修科儀戒律鈔卷之二

唐三

三洞道士法滿編

寫經鈔

夫龍章炳著鳳篆流慈紫筆題篇青林奏響浮黎國土廣度天人治鍊池中高明智炬皇人注之於曩劫青童授之於往年既開元始之章便勅帝君之筆法橋以架福岸可登抄寫書治於斯見矣本際經云若復有人紙墨綠素刻玉鐫金抄寫素治裝褱條軸流通讀誦宣布未聞當知其人已入道分名書金格列字玉篇大成云抄寫經文令人代代聰明博聞妙蹟恒值聖代當知今日明賢博達皆由書寫三洞尊經非唯來生得益及至見在獲福大戒云抄寫尊經一錢已上皆得七十萬倍報萬錢已上報不可稱然捨一得於萬倍常所讚嘆何況七十四萬之倍功德巍巍富貴之家可是虛受

千具科云若寫三乘經實本寫大乘而寫中小者得五逆罪本寫小中令寫大乘者無犯

存念呪鈔

夫經出聖口法乃凡修妙意難詳心易滯  
既立文字必不孤然部秩有殊存念亦異依  
所誦習各明典制

一誦本相經存呪先鳴法鼓三十六通禮經  
三禮呪曰

玄玄至真道清淨歸冲寔天真洪耀集百靈  
交景日四華傾心享故集大仙質天堂周時  
開成爾等檢膝妙品布宣化拔度三塗出

二誦黃庭經存念四極盟科曰誦黃庭經當  
燒香清齋身冠法服入戶北向四拜長跪叩

齒二十四通上啓

高上萬真玉晨太上大道君甲今當入室誦  
詠玉經鍊神保藏乞官華榮身得乘虛上  
拜帝庭畢還向東四揖太帝又叩齒十二通  
上啓

扶桑大帝賜谷神玉甲今入室披詠王經乞  
使靜室英芝自生玉華實耀三光洞明萬偏  
胎仙得同帝靈畢東向誦十篇為一過一過  
竟便還北向四拜東向四揖不須復啓若違  
科風刀之考

三誦老君經存念太極隱訣曰先燒香整法  
服禮十拜心存玄中大法師老君河上真人  
尹先生因開經蘊呪曰

玄玄至道宗上德體洪元天真雖遠妙近緣  
泥丸君官室皆七寶臙牖自然分清淨常致

真駕景乘紫雲日月左右照昇仙長年全七  
祖上生天世為道德門畢叩齒三十六通咽

液三十六過先心存左青龍右白虎前朱雀  
後玄武足下八卦神龜三十六師子伏在前  
頭中七星五臟生五氣羅文覆身上三一侍

經各從千乘萬騎天地各有萬八千玉女玉  
童衛之讀經五百言輒叩齒三咽液三也

四誦上清經存念金籙簡文曰讀上清經當  
北向經前九拜向東上座左轉北向玉經隱  
注開經蘊呪曰

微微玄宗門煥朗微嶮峒至道由靜默賞見  
三素宮大道於此成驗景乘雲龍左右侍經  
人玉女及玉童身漸不死津解羅順靈風七  
祖及胎生世為神仙宗金籙簡文云當叩齒  
九通思九色雲氣覆滿室青龍白虎師子玄

龜仙童玉女三界五帝之官備衛左右前後  
便行乘天偃地而誦經竟當從西而下床  
禮如初玉注云叩齒三十六通咽液三十六

過先存柶風混合帝一百神萬真然後讀經  
五誦靈寶經呪金籙簡文曰讀靈寶經當東

向經前燒香禮三拜北向上座玉經隱注開  
經玄蘊呪曰

寂寂至無宗虛峙劫仞阿谿落洞玄文誰測  
此幽遐一入大乘路孰計年劫多不生亦不  
滅欲生因蓮花超凌三界塗慈心解世羅真

人無上德世為仙家畢叩齒三十六通咽  
液三十六過存五藏五色之氣上注五星之

精而讀經  
六誦三皇經金籙簡文曰讀三皇文當南向  
經前燒香再拜西向上床左轉南向玉經隱  
注開經蘊呪曰

太上定神符勒命天地惠聞召不使駕萬仙  
儻忽萃招靈無小大豈況於滓穢清齋絕人  
事眇然與神對上昇玉清宮邀宴九遐外畢  
簡文云當叩齒三通思三色雲氣覆滿一室

青龍白虎朱雀玄武備守四方神童玉女營衛左右咽氣三過而誦經經竟當東西下床禮如初

七步虛玉經隱注曰誦步虛經時先叩齒三下咽液三通心存日月在已面上從鼻孔入洞房金華宮光明出項後煥然作九色圓象薄入玉枕徹照於十方隨我繞經旋迴而行矣日從鼻左八月從鼻右入畢又叩齒如初因誦命魔密呪百姓齋威儀云命魔呪曰黃中策氣斬妖宗察制強精斷邪翁太上有命太上房急召北帝詣玉宮受承威令宜魔王五氣翁鬱與命衝秘藏王文方就隆三天運明六天運終賢者哉都講可唱云衆官各思九色圓象咽液三通存命魔密呪步虛如法

入出道戶存念金籙簡文朝入道戶齋堂於戶外叩齒三通呪曰  
四明功曹通真使者傳言玉童侍靖玉女爲我通達道室正神上元生氣入我身中使進老子存思圖曰四明功曹一人通真使者一

人傳言玉童二人侍靖玉女二人金籙簡文云夜入道戶於戶外向戶叩齒三通呪曰

四上功曹龍虎使者正一生氣侍靖素女夜有啓請願開明童子上玄少女與我俱入黃房之裏通達所啓皆使上聞便進老子存思圖云四上功曹一人龍虎使者二人侍靖素女一人開明童子一人上玄少女一人金籙簡文云出戶又叩齒三通呪曰

出陰入陽萬神開通關啓事說請開黃房侍靜王女明備神宮存思圖云王女者是自然妙氣應感成形形質明淨清皎如玉隱而有潤顯又無邪學者真階漸昇進退在形出入在道道氣微妙洪纖畢應引以次從卑至尊故白日則王女守宮夜則少女通事濟度危難登道場也金籙簡文云夜出戶左顧又叩齒三通呪曰

玄上太陰八牕開明向有所陳少女通靈事畢復位萬神潛寧

夫真經聖典煥發諸天王字金籙流傳今日

道深甚奧秘難開若非大能人寧便迷見曉

一明背向者昇玄經曰講經之時法師與經師對坐座高五尺坐時東西南北隨便以三拜爲限

二明存思者老君存思圖曰上講時先存三色次存三行道有六時上講恒三時食後上脯人定三時入齋堂捻香禮三拜巡迴依次坐坐竟有衆者法師以板擊席仍放板膝前臨目握固存頭氣青兩手氣赤兩足氣白三氣繞身訖次存三一者三處之神同一道也其道本一應感成三三界內外無乎不在統化主物號三天太上宣教侍經號三素老君降人成德號曰三一三一在人人有三官頭腦名爲上元宮其神曰夷心內名爲中元宮其神曰希臍下名爲下元宮其神曰微皆如嬰兒俱長一寸靜坐正拱無欲無爲體無應有次存三師先起向座於座前禮三尊三拜次仍存經師籍師度師各禮一拜合六拜乃登高座次存侍衛登座大坐欽板當以鳴

鼓三十六通咽液三十六過臨目見左青龍  
 右白虎前朱雀後玄武足十八卦神龜三十  
 六獅子伏在前額中七星五臟生五氣羅文  
 覆身上三一侍經各千聖萬騎仙童玉女衛  
 之夫存思為靜念之首入定為息慮之端辯  
 鑒神遊不疾而速座下以存三師三一上座  
 又思侍衛威靈三拜足表三尊六拜垂於四  
 衆今座下無勞存思但三拜訖上座安坐先  
 存三一次三師後存威靈侍衛稍將簡要存  
 思之法心想易周遇事盤迴乃近時務謹依  
 舊典書而述焉

三明明讚誦本相經云齋主請法師開講便起  
 三上香齋香爐詣法師前三拜長跪請曰弟  
 子等千載幸會遭值法輪元始遺教流布於  
 世今日某雖復奉道希聞靈音唯願法師流  
 布慈澤法師許欲昇高座詠曰  
 弟子仰法師 敢啓有所陳 衆生闇塞久  
 思聞至法音 大慈開長夜 設化萬劫新  
 主人建福齋 延及四輩人  
 法師昇高座時詠曰

齋直道所務 妙品元始貴 故設祖劫橋  
 廣度諸民物 爾日設清齋 帳座羅五色  
 天仙遊誕上 五帝列方職 功曹傳符命  
 擁衛左右直 我昇龍輿座 玉梯附杳息  
 神膏助授護 天魔不舉目 五神不移動  
 披宣太上域

定座詠曰  
 大道無為中 積氣運起形 為衆設橋梁  
 故遺無等經 修之得長樂 莫有三界生  
 燒去六塵垢 一心靜念聽

下座詠曰  
 妙品演布化 迢迢霄玄音 等受無礙智  
 三梁度黃津 神膏功曹使 疲勞小停神  
 三會因勞賞 當報不負言 須啓更當白  
 便曹未志懸 下座服居位 禮拜三寶尊

夫論修建福田皆希言簡事要類以繁重行  
 者難遵今人唯受齋主拜請兼以上座下座  
 讚詠足得以成法事何俟曲碎云為故兩存  
 焉恐情有去取耳

發心鈔

發心者聞說大乘皆須夷心注念歷耳雖言  
 是一悟入即乃不同有六種緣緣行不等一  
 則或見邪託正則知非正二則或信邪是正  
 則以入邪三則或聞大悟小則入粗四則或  
 聞小悟大則入妙五則或從心進乃自發願  
 六則或從心退乃自成咎亦由說有巧拙亦  
 由悟有淺深本際經云若悟理明師巧說諸  
 法無修無得無滅無生非有非無非因非果  
 而有而無非不因果巧解因緣假名中道解  
 此說者能感異類如本際經云天尊一音演  
 說法衆生隨類各得解又如本相經所明天  
 尊於禪黎說洞玄真文七十萬劫不起于座  
 七百萬衆悉不迫迨十方龍王放光而來聽  
 法天尊弟子靜慮云龍獸尚復樂道而況於  
 人言畢龍王忽怒與雲下電積高十丈於是  
 天尊布五色之氣結雲成幔上軒雪電不傾  
 不動說法如故有此威神十方通悟本際經  
 云若說小乘有得之義生滅相法有有無  
 有因有果如是說者名為明師  
 大真科曰當聽法說實議五音調和五德時

習讚詠長遠鄭聲和言徐語漸息靜辭誦詠  
靈文應和法唱久剋王響世音之根永斷若  
修經習業以千文為先講說今通度人濟已  
化物無窮此為大乘之人雖才議未堪當發  
勇猛之志願得大乘超出三界勿戀小乘貪  
著利養樂人天樂為私己之業苟存細益忘  
忽大功為人齋章規化觀信醉酒耽色聲味  
快心假言大乘實不能解所學小術妄求大  
成誤已墮苦可悲

玄都律曰法師宣化天下萬民是救蒼生之  
道不得貪財傳奴婢等法違律考病一年若  
有德法師為行清苦上衣法服理合供養大  
戒云施散法師香油齋食法服一錢已上二  
十四萬倍報功多報重代代豐有恒無窮乏  
一則若見邪為正則知非正者如真藏經云  
突教國王恒信正道妖人來欲化王令習偽  
道變形騰空音樂讚誦宮人綵女觀之迷惑  
三七五旬遂無悟醒王告之曰汝是妖邪急  
須早去妖人言我是正道勸王修善王曰我  
聞有道之士藏名匿迹人眾不知正道杳冥

有形則偽命臣道靈令與論說通靈曰外道  
多偽不足堪談共論惠源形無立所仍即絕  
對寬影逃蹤三千餘人更無敢出自自然磨滅  
國內清正信向大乘當知邪不害正其來久  
矣二則若信邪是正則以入邪者如真藏經  
云自通國王行善智劣為野狐所惑野狐語  
群狐徒眾云自通國王樂善棄惡智淺不深  
我有妙術能飛能隱向王殿前去地百丈為  
人端正談空解義使王布施捨命攝歸共食  
可非上計群狐徒眾俱聲唱善狐王因誦幻  
術經文數百餘卷飛王殿前去地百丈坐虛  
空中口誦經典國王眷屬大小悲泣嗟嘆無  
已出國寶物悉皆捨施復有三十餘人一時  
捨命狐王唱言捨命之人最是上士忽作疾  
風死屍寶物悉皆攝去到群狐窟共食人肉  
復遣狐子變作人形齋實市貨至屠兒行中  
猛狗爭骨相嚙狐子心怕不覺變形狗便嚙  
殺屠兒惶怖即告市官官告州州即申奏王  
見寶物俱皆自識王云此物並將布施聖道  
何故得在野狐手中時有大臣名曰仙靈上

白王言前所說經教化此是狐魅但誦其文  
不解其理勸人作善心口乖違飛行殿前即  
知虛偽王曰錯失奈何仙靈曰可集軍眾圍  
彼丘陵狐即變作人形迎王再拜猛狗來逼  
變為野狐狗即嚙殺王命群臣鑿土窟中大  
得寶物當知王無深智為邪所惑三則若聞  
大悟小則入魔者如昇玄經云道陵所問云  
衆中小行者多大心者少若其不說無由可  
悟若說大法恐迂小機如說小乘復迂大行  
天尊曰此其不難機在請緣不論多少小緣  
請者即為說小緣請者即為說大其中悟  
入亦復無常或有聞小悟小或有聞小悟大  
或有聞大悟大或有聞大反小昔有善男女  
等八千四百餘人雖解信從執求上道起有  
得心求無得想封執大成人成不業經四千  
餘載正得地仙四則若聞小悟大則入妙者  
昇玄經云天尊云我於始青之天大浮黎國  
初說法時有一地仙殿乃姓洪名曰法起為  
發教緣請我聞說我觀其人未宜說大即隨  
其心說三雜經爾時大衆無億數人其中乃

有一十八萬六千餘人聞說小乘深悟大道即起三有迥出道場五則若從心進自發願者本際經云若有讚說數揚妙義應當讚嘆稱其功德無使外魔破亂其事又云若講其義趣勿使法師過諸橫惱明以資須給其所乏要令妙教必得流通本相經云天尊說法之時八萬四千之衆心間意解發無上正真之心而不退轉即除七十二結百種煩惱又云有長者子名曰法龍信解恭敬有七十二萬人皆心務真空無上之道真藏經云天尊說法之時有三童子發願各別一則惠力童子發願修習二則寶明童子發願說經三則山際童子發願學道經云有惠力童子及諸眷屬俱發願言修習大乘誓無退轉了諸法性得到達底悟解大乘成無上道又有寶明童子發弘願心講大乘法誓度衆生到解脫處成無上道又有山際童子勇猛精進發弘誓心學大乘道修四大城決五逆賊除七惑鬼殺十礙魔剋無明障刺三賊心堅硬不退又云有大弟子修行讀誦講說尊經能生信

心常行不怠當知是人於諸尊所施行功德而種福田無量劫來尊師大乘今遇此經能生信心六則若從心退自成過咎者昇玄經云有八百七十二人聞說大乘有八男子一女人不信意從座而退為天魔異道惑亂其心此輩即得重病髮毛墮落死入三塗生輒龍音縱有耳目好言善譽初不聞見當知悟法深淺總從心生以此諸緣足明證信

受持鈔

有四緣夫以經文誰而能入雖云空有非修不成若以修持要乎真確行合規矩道位遷昇機慢靈文罪罰明矣

一明讀誦緣者四極明科曰誦經當令言句相屬不得越略天音失一句更却一百言而讀失二句却二百言失至五句却五百言始就誦失一句便誦一篇而補之至三十犯刀山之考又云誦經當令目注經文心念神真不得臨經他念異想以亂天音三十犯刀山之考又云誦經千言以下不得臨經進飲千言以上至五千言得一進飲五千言以上得

二進萬言以上得三進至三十犯身被左官考若至萬言神疲氣極得中住消息後得續句竟篇雖爾不得經宿殘句十犯死入地獄誦經時有善男女欲聽者得男左女右東西異位道俗殊別不得男女混亂同床共席要在出家人後不得前行有犯身被左官考玄都律曰若通經語論及世務罰油三升又云讀經忽亂請問敗句罰油五升請問下云讀誦如對太上勿得傲慢狡笑論及流俗榮利之務侍經仙童即奏名於三天司直三天司直上奏太上三奏太上子必失經鬼神亂考必不得以壽死將何仙之有又云經不從師受則侍經仙童恒司考人殃及七世金錄簡文曰上座誦經當禮經師藉師度師各一拜餘如常法皆始登座一行之後重誦經則不復如始也明日更一過行之耳誦經之次不得與下座交語經句不竟亦不得中住若住後皆更從上始五百言得進清飲咽液也此與前四極盟科稍有通塞盟科云萬言得中住即從前始前似稍通此文全塞誦經時

得存念節度并不犯科條立有靈應本際經云若復讀誦此經依經修行晝夜不懈是人所在之處自然安樂隨所往生得居淨土又云若復有人於此經中受持一句意樂誦誦一念之中即能滅除無量無邊宿根罪惱譬

如積夜暗室一念燈明暗暗皆盡若入大海遭值惡風誦念是經風浪恬靜若入山林逢毒蟲猛獸誦念是經蟲獸却退若值盜賊冤家相逢誦念是經冤仇渙釋若在怖畏誦念是經鬼魅消却當知衷心注念無不果剋大

梵國王為國大旱迎請尊經以滅旱災多惱國王國多障難迎請尊經故疾新病並皆痊愈當知經有威神誦念必應太極隱注曰誦道德經常有三萬六千仙童玉女侍經燒香散花通致眾仙隱注又曰誦道德經萬遍雲

與下迎若不至可一月三誦之無不至者具藏經云昔有玉印童子燒香讀誦此經忽有仙童玉女徧滿虛空一時來至燒反風名香讚誦靈文驚動一國王印童子安然不恐今日建齋之家亦選能人上座誦經者雖妙極

音句座下者曾不存心或開語喃喃兩兩相對或爭色欲或競錢財大德高枕安眠低頭踞傲上既不能秉正下則豈為虔恭一則交關威儀二則不生善信三則主人鄙薄四則宣考至身幸須三思寧寧苦勸大德若能勉勵法衆何慮不從頃不切礙是滅道法

二明聽誦經之得益緣自然經訣曰聽誦經人至章句輒心拜隨意願念唯令心苦必有感應玄都律曰若聽經倚據不正罰油一升若不注念清虛心想意倦為衆所覺罰油三升若能心聽誦與自受持無別本際經云若復有人一心正念聽讀此經歡喜踊躍得其義味忘於寢食不覺為久當知此人過去世中已曾聞值暫生下世寄惠人間不久仙度終歸

得道 三明明養持經緣真藏經云天尊問善明童子有人將金玉重寶並悉捨施此人功德以為多不答曰功德希有然不及於此經中講說書寫受持供養功德勝彼百千萬倍此經

名為惠力法城善護群生除邪惑障本際經云若復有人捨家資財或賣妻子市諸香油種種法具及以齋食供養資給持此經人所得功德最為無量何以故是人能成功十方天尊出生衆聖故昇玄經云供養持經者功德相亞次供給香油燈奉上幡花本際經云若有國王及以民庶殿堂帳座寶蓋幡幢香

花燈燭供養此經者汝等四衆及諸天帝三五吏兵天龍神鬼金剛力士侍經真官應將徒衆隨逐尊奉禮敬供養護其國土保祐人民本行經云昔有女人奉受是經晨夕誦習夫恒供給香火婦遂昇天受號今為梵行元君夫後命過經入大山具陳供給之功婦即來授夫是經即昇南宮百年得生國王之家大受經法命為九宮真人又有賢士受持此

經婦意悵惜不與夫同夫得昇天婦後化為餓鷹夫以化度還為女身受持經法今為南極元君皇妃當知持經奉法明明不虛誹謗慢驕自招其考四明謗法緣真藏經云衆生不信法者是為

謗法是為滅法不信根中而有三實不信去來而為真實不信大乘而為根本不信眾生等天尊性不信諸法寂滅無根無因無果不信眾生從無量劫積種未形而無生滅如此不信是名毀法是名滅法法不可滅障法不見名為滅法既滅法已而得身相是為生死輪迴不絕必墮地獄無緣得出本相經云若見經法忽若土草了無恭敬之心見他行善背面皆笑未無助仰之性斯人從六畜中來始得人形故不信法真藏經云往古劫時有五貧士不信經法不信眾生有真道性不信眾生即經妙法不信眾生不生不滅不信眾生心大如海不信眾生為太空聚如此不信即得重病生入閻獄死入閻獄食入閻獄息入閻獄諸善男女各自思惟勿生不信天尊因作頌曰

為人不信法 毀謗於賢良 死受鄴都報  
 劍樹碎形傷 萬劫無期出 魂神痛斷腸  
 叫聲聲不絕 獄卒添鏝湯 受報無休息  
 瞋眼四邊張 誰能受此苦 迷惑亂猖狂

寄語修真子 修福永無殃  
 然聖人之言本無虛誕為不信法自以招殃若更語云經有萬八千玉女玉童侍衛益不信受或以敬露或雜世典或不洗口手或無護淨但不依讀經儀則即名詐謗請問下云經污不以香水洗沐則魂魄奔落本際經云若復有人詐謗此經生不信想輕慢法寶疑毀聖文當知此人無量劫來沉淪下鬼受諸苦報備歷異形始得受生還於人道愚癡觸辟無所解知習惡種因不能信受所行非法動為罪由背正入邪違真信俗三官九府記入功過書名黑簿死錄之中或在見世恒蒙諸苦或犯王法執繫鞭笞或在惡風蟲癩之病憂厄惱難貧窮困乏或為外魔異道惑亂其心雖在世間人所棄薄周詣遊處不值善緣一失生道永乖賢域死入地獄無有還期受報幽牢絨閉重檻晝夜拷掠不親三光或抱銅柱形體焦傷或上刀山痛毒難忍冥冥長夜萬劫無出縱得受生還為六畜非人之類永失人道總明經法諸緣以畢於此闡經

受誦子細詳之

受修科儀戒律鈔卷之二

1 (00) A B 37-2